

福建續志卷四十二

人物二

國朝

張可立字蔚生福清人順治乙未進士授萊陽令履畝清丈民德之改興化令開濬市河設立藥局息訟省刑水旱災傷必上籲得請後己邑志散佚聘名士排纂焉晉知涼州值王師西征有強卒虐民可立抗論置之法禁旅肅然攝涼莊道擢刑部郎中治獄多平反年七十餘致仕卒崇祀鄉賢子

晟西安通判

江南通志

福建續志

卷四十二 人物二

一

陳魁字字學薦福清人康熙丁未進士耿逆變僞遊擊迫脇紳士助餉魁宇不從軍士羣毆之遂逃匿深山逆黨平錄用靖節士夫魁宇未及受職而卒雍正二年督撫奏請祀忠義祠

福清縣志

李燦字君發宋延平先生裔孫先世遷候官燦與兄尙斌鍵戶讀書尙斌補博士弟子終魏縣令燦以閩清籍登康熙丁未武進士甲寅吳三桂反總督董衛國薦燦於安親王隸將軍石進麾下數立戰功隨征建昌後營將縱兵擄民間子女燦爲親送寧家凡四百餘人丙寅春江西賊韓大任據吉

安勢方張城外列舟師犄角燦夜半以兵百小舟
五襲其水寨奪巨艦九以歸自是賊喪膽撤水柵
兵明年三月城內賊急渡江燦同水師將沈甸侯
進截戰達旦斬獲無數大任大懼遂棄城遁恢復
吉安燦功居多戊午燦以遊擊隨將軍林興洙用
兵長沙大小數十戰皆捷賊走衡州追奔三百里
進復寶慶次紫陽河鏖戰三晝夜大勝之有營卒
奪人子女白將軍還十二人抵卒於法庚申五月
督師由沅州進貴州力戰連勝隨王圍雲南省城
雲南平累陞至貴州銅仁協副將擢福建金門總

福建續志

卷四十二 人物二

二

兵卒於銅仁燦號令嚴明法無濫及雲南之平以
功獲賚美女十六初陽受隨悉召其親還之子培
坊皆縣令有政績

陳宏謀撰傳

陳一夔字瞿石候官人丹赤長子丹赤死節一夔年
甫十三已露頭角耿逆欲芟夷之晦跡得免康熙
癸酉耿逆平一夔列其父殉節事上於朝賜
謚忠毅一夔以難蔭入監授浙江安吉知州甫下
車立十戶督催單聽民封兌自投匱里胥不能爲
奸徵漕時躬履各倉廩較量斗斛除浮滿諸弊毀
淫祠葺雉堞修學校建橋梁利無弗舉以卓異擢

兵部武選員外郎陞刑部郎中出知湖州絕請託
却苞苴捐修文廟兼造諸祭器率博士生徒訂鐘
鼓祝楮悉如古法而於生民利弊尤加意抉剔請
減米價以救德安之饑緩漕徵以甦蝗傷之困勘
水利以備旱澇戢匪奸以靖里閭吳興七州縣無
遺便任湖十三年罷官起知寧波府攝兩浙鹽法
道事明年杭州饑出廩賑之計口授粥計粥給米
全活無算有王士元者自稱明宗室盜魁張念一
輩從而和之煽惑愚民上命大臣會督撫訊鞫
委一夔辦之爲審其虛實按律詳整剖晰無枉遂

福建續志

卷四十二 人物二

三

成定讞尋擢糧儲道以疾卒湖人立碑以紀其績

祀名宦祠

陳氏
家傳

陳書字特卿長樂人性豁達八歲失怙事母以孝勤
讀書爲文自成一家康熙辛酉舉人授安仁令值
有南嶽差革往例以蘇百姓訪苗之詐術者按治
之刁風以息丁內艱服闋補通江令減茶稅革重
耗詳免加賦民德之壬午乙酉分闈校士俱稱得
人爲治務德化不事刑威擢刑部廣東司主事歷
浙江道監察御史法司會讞多平反不肯阿徇巡
視中城神奸巨棍訪治殆盡掌登聞院及掌江南

四道事凡所條奏多稱 旨在臺數載 賜御纂
經書及佩文韻府等集後卒京邸祀楚蜀名宦入
本縣鄉賢祠

縣志

陳子威字其畏閩縣諸生康熙十七年海上寇擾子
威與其叔君翼獻策軍門曰寇所恃者沿海之人
爲之耳目故鴟張豕突猝不易制若聯絡海上漁
艘斷其聲援賊不難盡矣撫軍吳興祚善其言啓
康親王入見備陳內地奸宄遂招募鄉勇澳民
三千名建聯絡營給聯絡僉事道劄所在勦捕歷
著戰功克復金門廈門臭塗澎湖招撫臺灣等處

福建續志

卷四十二

人物二

四

興祚上其事授南韶道遷涼莊鄖襄叅政致仕歸
生平長於詩有嵩山詩集君翼閩縣貢生授聯絡
通判劄擒僞都督章元勳又追殺僞將王亮歷戰
有功卒於軍子瀛襲授金華府通判

府志

龔嶸字岱生閩縣人父其裕際耿亂領鄉兵隨將軍
進勦躬爲嚮導復江西上高新昌二縣以功授吉
安府陞兩淮鹽運使力除鹺弊民德之嶸爲其裕
長子弱冠隨父任吉安阻於耿亂不得歸鄉試以
父命勉就縣職授餘杭令嶸稔知諸弊下車卽戢
營丁禁關役甦派累葺城垣新文廟創義學以及

開渠築堤百廢具舉尤長於讞鞫有某生以奸殺其僕坎而埋之截其足枝指投路若虎傷者磔推勘得其屍處而置生於法衆乃大服擢松江府崇明海漲磔渡海安集災黎全活以千數調保定守直屬三木之刑製短僅尺且不鑿臼冤者往往畏刑誣服磔力請更之清監獄恤驛遞格蝗蝻開河渠政勤而利無不舉擢江西饒九南道饒爲江湖窟穴號難治磔至法立令行萬年都綱煽變磔策款段疾行數百里抵縣召衆從容曉譬以散其黨刑渠魁一二人奸謀遂寢嘗見鎖闥湫隘乃捐俸

福建續志

卷四十二 人物二

五

庀材拓屋五百餘間都人士以爲盛舉歷任四十餘年而歸宦橐蕭然年六十七卒

吳文煥撰誌銘

李馥字汝嘉福清人康熙甲子舉人任工部員外轉刑部郎中以治九門提督陶和器獄有聲出守重慶郡經流寇亂後田賦無考馥履畝清丈侵佔弊息遷河東運使調蘇松常鎮道晉江蘇按察制府擒治奸民株連百餘人馥察其冤口者盡白釋之轉安徽布政巡撫浙江時亢旱請截漕二十萬民不知饑又漕米例用白糧馥疏請兼收紅白民便之以失糾屬員去任馥家素封義所得爲必勇爲

之在官以廉慎稱家遂中落歸田二十年借屋以棲怡然自樂與士大夫文酒往還年八十餘重宴鹿鳴又數年卒

府志

陳學孔字集斯號紫山候官人康熙庚午舉人父恭六安州牧遏惡旌善爲政寬猛兼濟州人德之居家以孝友稱學孔夙秉庭訓篤學勵行初知遂安縣剖獄如神飛蝗入境爲文禳之卽去歲饑力請賑卹按戶載冊計口給糧吏胥無絲毫中飽行取擢戶部主事釐清曹務擢河南道御史凡國家建置與民生之欲惡利弊知無不言一時想望丰采

福建續志

卷四十二 人物二

六

稱爲眞御史數年乞歸築室道山之麓與二三老友唱和著有道山堂詩文集從兄學夔康熙己酉舉人力學有孝行耿逆煽亂矢志不污僞命閩人

重之

陳氏家傳

鄭善述字孚世閩縣人康熙庚午舉人除固安令邑旗民錯處强者或凌暴細弱民苦之善述一切繩以法乃不敢逞地濱永定河河工椿葦輒取給於民善述調度有方人以不病以失出鐫級歸家居閉戶却掃文酒自娛著有敬修堂集子方城字則望籍建安少受業於嚴父隨任固安習知政體以

貢授泰寧訓導善課士雍正癸卯舉於鄉時季弟方坤先登第歷景州知州方城在署佐理益負經濟才暇則兄弟拈韻賦詩今所傳唱和集是也

府志

周懋勳字錫弓連江人康熙庚辰進士里居八年閉戶讀書不改儒素授廣宗知縣廉潔自矢邑有例金立革之會大旱民饑籲於大府發常平倉以貸復額外借穀三千石爲粥以活貧餓陞吏部主事未行卒敝篋蕭然士民爲之感泣

縣志

林兆惠字子方閩縣人康熙己卯舉人知貴縣平易近人人懷其德擢泗州同知州邇苗黎土番雜處

福建續志

卷四十二 人物二 七

兆惠以至誠臨之不假威嚴入覲特擢廣南韶道正己率屬爲制府所器重有忌之者以奉文採買楠木不如式去官兆惠胸無城府與人交有終始尤篤於故舊周恤貧乏而窮約自甘有古君子之

風焉

府志

鄭任鑰字惟啓號魚門長樂人章仲子康熙丙戌進士由庶常洊歷侍講在京邸與李公光地孫公嘉淦倡明理學引掖後進甲午典試江西庚子視學江南風清弊絕所拔皆知名士福撫潘公思渠其一也世廟在潛邸稔其名初擢湖南藩司尋調

湖北繼陞巡撫宦楚兩年正□□屬封疆肅然嘉魚等二十七州縣水災任鑰□靖蠲賑復慮遲緩預以養廉倡之全活無算署湖廣總督篆討湖南逆賊謝錄正等密授機宜逆黨□平 召入掌副憲旋往江南查倉穀民戴之建祠祀焉雍正十一年回籍卒於杭州著有樂善述略自治要纂朱子或問小註古文正宗萊川詩集縣志

鄭金章字若敏閩縣人丙戌進士授梓潼令再補河內值鄰邑河決水勢瀾漫奔潰金章露立河岸率工人築土護隄如是旬餘隄堅而水不得入民恃

福建續志

卷四十二

人物二

八

以安隄外被水災黎流離瀕死金章法汲黯策先發賑而報聞全活甚衆卒以此□上官乃鬻產償之罷官歸當事重其學品延主鼇峯者六年教人棄浮名而崇實學士風丕振金章篤學性耿介罷官後饘粥不給而傲骨凜然人遺之金弗受年八

十五卒著有詩文稿

黃任撰傳

余甸字田生初名祖訓字仲敏福清人籍寄南平康熙丙戌進士巡撫張伯行開鼇峯書院延甸主之每事咨焉郡守周某將登白簡以□□疑甸排□後甸知江津縣□適補本郡守□□焉甸不

爲動攜一僕莅任早起坐堂皇民有投牒者據情
事輕重卽命之檄召所訴人不以屬吏單辭立決
訟爲清簡惟日據案與詣生誦說文字徵收錢糧
卽貯庫中絲毫不入私室守廉其實亦加敬焉時
總督年羹堯蔑視郡縣吏甸懲其官弁之虐索夫
役者羹堯亦不加譴以績最擢吏部考功主事每
事必親不假手胥吏出入封緘其室自佩鑰鑰上
官有疑事必以屬甸不畏強禦同官皆不悅遂乞
假歸陳鵬年總督河道薦爲濟寧道清白勤事一
如江津後鵬年卒上官忌之鐫秩去民號呼數百

福建續志

卷四十二

人物二

九

里事聞蒙 召見語移時特授山東按察使甸同
二僕買驢之官人競傳曰此三閭大夫也入爲順
天府丞適知縣某以賄敗坐失察除名歸築葭湄
草堂著書其中復爲觀風整俗使摘其集唐詩爲
怨望賴 聖德矜全獄白而卒年七十二甸剛方
清簡長於吏治仕宦三十年屢起屢仆而名不衰
其文章書法亦冠一時

府志

嚴夢兩字伯任號覺軒爲人倜儻善詩文康熙戊子
副貢生補八旗教習雍正初當軸薦授中書合人
奉 命四川丈量民田精密不苛民懷其德同官

多被譴而夢兩於事畢加一等議功例擢主事以親老乞外授慈谿縣有訟殺人者審鞫無凶器太守欲重其罪夢兩不可曰吾豈可殺人以媚上官乎歷攝台州寧波紹興三府同知大府重其才凡巡視海塘轉運官銅諸役輒檄夢兩董其事乾隆六年補義烏縣居官勤慎專撫字緩催科修文廟及東江橋好士下賢歲時進秀民而訓導之縣試所拔多英才邑人以比連青天連亦閩人名一鳴有遺愛於義烏者也夢兩與攝守忤免官歸囊橐無遺未幾卒著有詒經堂詩集居官格言子永

福建續志

卷四十二

人物二

十

齡國學生篤學有文名

縣志

邵言綸字思飭連江人康熙己丑進士知息縣邑多豪族猾吏言綸繩以法使不得逞凡常例所派於民悉禁革之培植人才識拔皆一時之雋方正嚴毅與上官多齟齬爲總督田文鏡所劾安置濟寧蕭然自得無幾微見於詞色後卒謫所

府志

陳治滋字以樹號德泉閩縣人穎敏力學十歲通五經大義能屬文康熙癸巳進士□庶吉士授編修丁酉戊戌鄉會兩科同考官所取皆知名士丁父憂服闋□御試各翰林詹事治滋試稱旨蒙

恩賞資母老乞歸歸八年而親喪畢改擢江西道御史尋掌京畿於民生利病詳切敷陳如奏文武科場應需物件勿借端攤派以飽吏橐凡入官抵帑之產未變價而奉旨豁免者請各地方官造冊報部查現在未變價者按籍給完本人不必輾轉飭查啓吏胥措勒索之弊上允其請擢奉天府丞府丞司學政事治滋振興文教親率師儒講學示以行己立身讀書敦行之要又選定古文時藝爲多士模楷當是時奉士登賢書者前後二十餘人四攝府篆政成事理蒞任凡十載以病乞

福建續志

卷四十二 人物二

十一

歸歸三年而卒治滋家庭盡孝嘗纂輯家禮一卷冠昏喪祭諸大節先自躬行爲都人士倡教子居家以孝弟居官以清慎勤爲勗著有留都草學圃詩文集憶昔錄子朝礎內閣侍讀朝柄議敘知縣

朝棟慈谿知縣俱舉人

雷鉉撰傳

蔣迪字濬川康熙丁酉舉人初任博羅縣繼任永安再調南海皆有聲以足疾告歸起補天長縣乾隆五年冬調任崑山明於聽斷不事苛細半載中濬湮河禁戕山掩骼埋胔義學義倉橋梁道路次第修舉薄於自奉嘗曰留一分清俸爲民間作一分

善事分校入闈積勞卒年五十五子奕湛字椒堂
乾隆庚辰進士工詩文補福寧教授未及任而卒

志府

何瀚字君濟閩縣人少有至性以孝行聞康熙丁酉
舉於鄉雍正間授從化知縣以清廉自矢邑久旱
禾苗蟲生瀚步烈日中祈禱雷雨大作苗潤而蟲
消近礦設四鑪鑿礦丁以千計多不法瀚嚴約禁
礦丁畏不敢犯革常例金千餘并除民夫六千餘
名立碑以示一縣稱爲神君旋調電白奉檄查丈
新舊墾復之地不煩苛擾民而豪釐悉照歲甲寅

福建續志

卷四十二 人物二

十二

高州颶風大作各邑田舍俱壞而電白日霽風清
民安堵如故上官以是知邑令之賢也先是邑苦
潮患遇秋汛水漲田廬每多湮沒瀚治電兩載潮
患俱息以耿直不容於時改崇安教諭至則修學
宮新樂器朝夕訓課多士士風丕振年老致仕囊
無長物嘗讀書平遠山房博學通貫而長於詩古
文著有粵東草平遠臺詩文及詩說諸編黃任撰傳
許均字叔調號雪村候官人康熙戊戌進士選庶吉
士改吏部主事在考功冰心鐵面人不敢干以私
前官余甸亦慷慨任事人有閩中二考功之謠尋

擢禮部郎中以薦出清查江南虧空錢糧均分□
揚州不苟不縱方以上績奏俄卒於署揚州守陳
宏謀爲殯焉復捐俸歸其喪均在官嚴正有重望
與人交久要不忘許氏三世皆以詩書畫名均克
承家學著有雪村集志府
何勉字尙敏候官人少倜儻有大志學書不得意改
從戎康熙己亥候官土寇薛彥文嘯聚後洋勉以
計擒之授把總是冬浦城山寇竊發制府令勦之
勉請以單騎便宜從事僞爲行旅直至賊巢得其
實檄附近營將一鼓平之擒賊首江一清等以獻

福建續志

卷四十二

人物二

十三

授千總辛丑臺灣匪寇朱一貴作亂制府率兵討
之勉隨行間臺灣平時餘孽竄入山谷乘機煽亂
大軍不能深入勉出奇制勝搜餘黨幾盡制府上
其功奉 旨褒嘉賞給拖沙喇哈番准襲兩代以
守備用尋陞臺灣北路叅將時北路水沙營等社
自恃險阻不納餉奉檄討之軍從竹脚寮正路抵
水裏湖勉率奇兵二百由北投社昌險潛師襲其
後擒首惡骨宗父子及麻著等其二十五社盡服
輸社餉計歸順男婦四千四十五名班師回與水
裏湖師會全臺以安陞湖廣洞庭協副將貴州逆

苗不法奉委往援乘霧而進用火攻法苗大潰戰
功第一陞雲南鶴慶總兵尋調廣東左翼又調臺
灣鎮掛印總兵又調南澳總兵歷鎮十年清操自
持以目疾乞休卒於家志府
謝道承字又紹閩縣人幼孤力學康熙庚子舉鄉試
第一明年成進士選庶吉士授編修乞假歸省晨
昏侍養築一枝山房率子弟讀書其中家居十三
年母卒喪畢 召見授中允晉侍讀轉國子祭酒
卽移居監中與生徒昕夕講習崇正學斥浮囂躬
率先以敦厲之太學風氣爲一變尋遷內閣學士

福建續志

卷四十二 人物二

十四

兼禮部侍郎仍領祭酒事未幾卒於官道承齟齬
開敏不羣長從舅氏候官林佶遊所學日進爲詩
歌古文詞軼出輩流性介特不驚聲譽時漳浦蔡
世遠長洲徐葆先以文學有盛名先後造謁皆不
報再官翰林驟被峻擢前大學士趙國麟實薦之
道承未嘗執門下禮國麟以是益重焉在朝歷職
日淺未盡其蘊時論惜焉著有二梅亭集子璈字
徵雲乾隆戊辰進士官戶部額外主事璟字徵宋
戊午舉人俱文學有父風早卒志府

張應涓福清籍閩縣人康熙庚子舉人以會試明通

榜授尤溪教諭邑爲紫陽鍾英地教人一以白鹿
洞學規爲法再調鳳山啓賢關正士習日與士子
講明大義風氣丕變秩滿擢知武鄉甫下車吏進
例金却之俗多告訐有數年不決者應涓神於聽
斷兩造是非曲直一見立剖決而民無株連守候
之苦其徵糧行滾單法先期清查里戶保甲順庄
挨滾全納者經歲無擾邑民便之遷霑化令再調
高密有僧智朗久翫法而民受其毒應涓至立置
之法一邑稱爲神明又重濬泊脉湖周七十餘里
墾田千餘頃民受其利捐俸以賑被水災黎墊完

福建續志

卷四十二

人物二

十五

流民逋賦八百餘金其潔己而多惠政如此數年
乞歸卒年六十三子登樞庠生孫颺揚乾隆壬午
舉人

李振聲字崇墉福清人雍正癸卯舉人任沁源縣晉
省徵糧較輕議加征振聲力爭於州守以地瘠民
不堪荷反覆數千言上官蔑以屈卒從其議計每
歲免浮額四千餘兩沁人德焉蒞政以明禮義端
教化爲本及寢疾百姓見緋衣導呼而出輿僕甚
盛越五日卒於官所著有寶陸堂詩集喪紀纂言

志府

□紹龍字允乾閩縣人少穎敏以文學名雍正癸卯
進士丁內艱丁未廷試選庶吉士時四川有清丈
之役紹龍承命以行蜀經獻賊之亂四野荒蕪
糧課缺額紹龍設自首法親覆丈之課有加而民
不病以績最授編修尋改監察御史巡察山西和
衷協理上下安之任滿巡撫據情請留一年遷右
通政積勞以疾聞上命巡撫爲醫治尋愈途中
丁生母艱上慰留紹龍以終制請懸缺以待皆
異數也服闋晉順天府丞卒於官紹龍風度清整
蕭灑出塵遇事□理有方方嚮用而遽卒善書法

福建續志

卷四十二 人物二

十六

人得其尺幅皆藏弃之子正思庚戌進士由庶吉
士編修典試河南有聲

府志

李肇梅字和甫福清人補郡諸生以貢入太學謁選
發湖廣以知州用初署麻城令緝硝磺私販倡捐
社穀二千餘石旋署知廣濟繕黌舍置禮器建義
學於鴻鵠山又修龍坪江漢書院文學以興廣濟
年徵南漕一萬三千餘石徵納多浮羨肇梅置斛
於倉令民執槩白平之由是輸者率負餘米以歸
武湖有浮屍驗無傷痕時有僧在傍神色稍異肇
梅召訊之知屍爲江右人向寓宿廟中詰其嘗所

來往具得奸豪誘鬻其妻子因卽擠之湖中情口
乃抵主名者於法人以爲神邑瀕長江有隄亘七
十里例飭三鎮里甲修築肇梅請大府均其役於
田畝力分勞輕至今便之調授蘄州牧丁內艱歸
卒二縣民爲刊其德政於石

府志

張世燦字雲階閩縣人萬年子雍正癸卯舉人歷知
增城饒平普寧興寧永安歸善新會七縣多善政
始任饒平歲旱饑世燦先賑後詳上官重之邑之
隆都隄近海幾潰於水世燦親率工堵築連三書
夜隄復完固邑賴以安於永安建廻瀾書院置學

福建續志

卷四十二 人物二

十七

田以育士於歸善開水利灌田豁除浮稅以利民
治他邑政亦如之皆以拯災恤患興利除弊爲己
責獄多平反絕一切餽遺干請以疾乞歸世燦天
性篤孝年十五親吮父癰居喪哀毀盡禮其歸田
也葺家廟訂譜帙瘞族屬之不能葬者卒年七十
著有葩經質疑子岱宗乾隆壬午舉人

許良臣字思夔號石泉候官人雍正癸卯與父鼎同
舉於鄉知增城縣尋署電白邑有林氏女仇家誣
訐以帷薄事女羞憤死爰書已定良臣爲直其冤
調鎮平七載以最擢崖州牧崖爲瘴鄉守土者率

僑駐郡城良臣獨至治所除採香陋規黎困以甦擒逆者王亮臣論功讓不居建唐李德裕祠訪其後教以學行歷儋化連三州皆有聲連有韓愈燕喜流盃二亭久頹圯爲葺而新之署理猺同知篆有平猺功遷廣州澳門同知歸食貧久之年七十無疾而逝

黃任撰傳

林枝春字繼仁號青圃候官人邦楨子由雍正癸卯舉人授中書舍人出蔡文勤公世遠之門乾隆丁巳進士以第二授翰林院編修性至孝讀書崇實學時禮部侍郎桐城方苞教習庶吉士枝春與論

福建續志

卷四十二 人物二

十八

經術性命之學深相契合督學河南江西進諸生庭授作文之法以經書爲根本先正爲準繩所至俱號得人晉翰林院侍講學士歷通政使副使在河南時有三教堂設儒釋道三像其位次以佛居中老子聖人居左右通省計百餘處奉祀皆緇流羽士比邱尼枝春奏請禁止上可其奏又陳學政事宜凡生員科試宜試性理論樂舞生宜令學臣選取部議俱從之未幾乞假歸當事延主鼇峰書院朔望集諸生於講堂示以立品持躬之要文章氣識之大一時閩中賢士爭出其門嘗議開水

部門沙合河當事從之水利爲近城最要鄉人頌焉家居十一年卒枝春至性純篤方爲舍人母家居多疾感噩夢心動翌日家書至卽虔禱於天請急航海而歸歸侍湯藥者五十餘日母歿哀毀骨立撫仲弟飲食憂樂同之五十年無間言生平持躬力學老而彌摯閩中奉爲圭臬書法不拘一體卑詞小札人爭寶焉弟夢彩字景仁純謹善讀書與兄友愛甚篤一日侍舅氏晚食盤中剝蝓蚌舅氏摘二巨螯以賜不食退謂兄曰家中罕覲此明日持歸一奉祖母一奉吾母有娣嫁而家極貧及

福建續志

卷四十二 人物二

十九

病且卒藥餌棺衾獨力任之無何姊壻歿又經紀其喪謀育其嗣其至性多此類乾隆戊午舉於鄉枝春子儀鳳浙江知縣一彪丙子舉人

林氏

家傳

興化府

宋

張式字景則仙遊人天聖進士調將樂主簿有銀冶坐歲課不足繫者嘗數百人式籍其人使貧富財力相兼亡者釋之課且羨歷知古田縣遷太常博士知咸平縣呂夷簡方罷相以許州觀察推官辟

之尋擇河北吏當道者舉式知洺州改虔州三司
市舶絹十餘萬匹式以非經數拒之復知濠壽二
州縣志

蔡高字君山仙遊人襄弟景祐進士調長溪縣尉有
媪二子漁於海而亡媪指某氏爲仇告縣捕賊縣
吏難之高獨曰媪色有冤乃陰察仇家得其跡與
媪約曰吾與汝宿海上期十日不得屍則爲汝受
捕盜責凡宿七日海潮浮二屍而至驗之皆殺也
乃捕仇家伏法民有夫婦偕出而盜殺其守舍子
者高急召里民環坐而孰視之指一人曰此殺人

福建續志

卷四十二 人物二

二十

者也訊之果服遷太康縣主簿卒於官年二十八
高嘗語歐陽修曰天子以六科策天下士而學者
以記問應對爲事非古取士意也乃刻苦爲學及
卒襄發其遺稿得十數萬言皆當世急務後朝廷
與大臣講天下利害爲條目其所改更於高之稿
得五六焉因共嘆爲奇才太康人哀其貧以錢二
百千爲賻妻程氏泣曰吾家素廉不可以此污吾
夫拒而不受修銘高之墓稱其能以惠愛其民以

廉化其妻云

閩書參歐陽修墓誌

林深之字原叔莆田人讜五世孫熙寧進士調南劍

州錄事叅軍侍御史張汝贇察訪閩部見建州訟牒叢委付深之理決時他郡連起大獄追隸相屬於道二州獨賴深之以免改知下邳縣秩滿年六十以知開封府都廂致仕子雱以父任補明州刑曹椽州守毛友治尙嚴峻雱決讞一無所徇遷通判福州適朝廷計僧口給食籍餘財輸戶部雲以閩地瘠民貧州郡多取辦寺觀若餘財盡籍戶部則州之歲計必斂於民卽白府帥張澄乞以利害奏聞自計口外餘財充歲計朝廷爲止不籍而閩之民遂免橫斂矣官終朝奉郎

閩書叅縣志

福建續志

卷四十二

人物二

二十一

黃君俞字廷僉莆田人校書璞京孫父問字君裕博通五經創上林義齋以聚英俊之士立爲五規曰修身謹行曰立志抗節曰潛心經術曰留意世務曰限日收功卒後左丞皇甫泌誄之曰義成逸士君俞幼強學著書一百卷名動京師試開封進士第一四黜禮部鄭獬滕甫王珪陳襄等文章論薦召試舍人院除國子監直講改館閣校勘卒

閩書

林廸字吉夫仙遊人少讀書於香山與陳易爲忘年交稍長通六經工詞賦再舉於鄉人太學登上舍優等紹聖中第進士授福州左司理古田縣上刼

盜五人廸曰此廸民耳法不當死縣吏文致其罪如民命何爲釋其寃旣而獄具帥疑焉再上再却廸持愈堅帥竟從之差知龍溪縣平易近民有古循吏風丞相蔡京林出也欲因是內交於廸廸以非族拒之歸自龍溪三上詞請休建炎中朝廷舉遺才廸與秘監李朴列在文學之科卒年七十六廸操履端方爲人所推重鄭樵稱其耆老碩德所在歷有治效凡著詩文百餘卷又詠唐史別爲一編皆寓褒貶之意

志縣

張珂字玉川仙遊人葆光處士弼子紹聖間以明經

福建續志

卷四十二

人物二

二十二

官右正言兼樞密院編修立朝忠正不爲權奸所容時哲宗任用章惇蔡京安置元祐君子於嶺南珂申救不納願與同貶慷慨登途未至貶所而卒

志縣

黃琮字子方莆田人元符進士調長溪尉戢吏便民丁父憂邑令憫其貧鳩錢幾千緡以贖琮却之徒步護喪歸服闋知閩清縣時興道藏安撫黃裳命屬縣歛民錢各數百萬琮獨不應命自詣郡以己俸四月輸之除通判漳州時鄉人方翼爲守琮與之可否相濟卒成美政未幾致仕傅崧卿爲給事

中薦之於朝曰政宣間邑令以治行稱者黃琮陳
麟翁谷閩部號三循吏而琮爲冠乞起用不報居
母喪哀瘠不食甘露降於總幃歷官三十年無一
夫之田半畝之宅年八十卒舊縣志
方屬字作謀莆田人崇寧進士提舉廣東常平宣和
初以不附燕雲之議忤王黼貶知瓊州恩威并行
官吏肅然又爲文勸諭黎蠻使不爲擾後知潮州
建炎中秩滿乞辭歸年四十八雅喜積書有萬卷
樓弟昀字文耕以兄任紹興中知長溪廉謹著聞
調通判潮州未上卒縣志

福建續志

卷四十二 人物二

二十三

吳公誠字君與莆田人大觀進士調古田尉政和初
林利等寇山谷公誠擒利置諸法盡散其黨改承
奉郎轉朝奉大夫致仕公誠清介絕俗歷官三十
年凡衣服布帛家人所須悉因鄉里市致未嘗取
之民間奉祠日以餘俸委之官至千緡死之日家
無餘貲閩書

林正字明輔仙遊人大觀中恩賜釋褐歷嚴州福州
濟南教官知定海邵武二縣尋除廣西西路提舉
歷屯田司員外郎除廣西提刑奏罷病民十數事
先是陳感稔惡高雷間搔擾諸郡正至海上招降

之盡散其黨數千人親押首領數十人歸於桂林
及論功自使臣以下遷官有差正獨不肯受賞除
廣南路轉運副使移兩浙運判遷左司郎閩書參
縣志
林一鳴字聞卿仙遊人正之子以父廕補官尋以煩
言去職奉母家居畧無干進意後梁克家當國起
知南雄州以母老丐祠尋丁艱服闋知惠州立祠
祀陳文惠陳史良蘇東坡唐子西四君子歲饑請
發常平賑糶民賴以活又奏罷病民十數事諭民
力學務本禁喪樂修城塘等事有殺牛者方揮刃
牛忽奔至堂下若有所訴見者驚異一鳴命飼其

福建續志

卷四十二

人物二

二十四

牛爲治屠者人以爲仁化所及官滿日僅存數擔
書而已改知常德府卒官至朝請大夫子澧以廉
勤自持知崇安縣有治績芝生縣圃閩書

陳可大字齊贇仙遊人政和二年第進士除熙州司
戶改潮州教授主試循州道遇畚寇聞可大名皆
引避靖康初知長樂縣加本路運幹奸民高溪等
千餘人帶兵器販鹽可大集弓兵出東關捕獲之
餘散走事聞封奉議郎興學校勸農桑整陂塘邑
人立碑紀德知肇慶府郡多蓄蠱毒設法除之端
溪出石硯常貢外加取以媚權貴民受其害可

大以舊鎮庫石裁製如式應貢民得聊生繪像祀
之旋以養歸官至朝散大夫累贈大中大夫卒年
八十八著有尚書解行世子伯玉仲珪皆以父廕

補官

縣志

傅佇字凝遠仙遊人楫之諸孫也年十八入大學重
和元年進士授無隸縣主簿會金人陷全燕乘虛
南下兩河皆震郡檄佇餉軍佇得檄卽行飛芻挽
粟軍以無乏調南安縣丞會歲饑民棄妻子者相
屬佇請出常平錢米設安養院具糜粥食之民不
失所踰年歲豐悉訪所親歸之遷知晉江縣會詔

福建續志

卷四十二

人物二

二十五

造戰艦佇勞費半他邑而事獨先辦帥張浚聞於
朝特減磨勘轉南劍州通判卒疾革猶戒諸子曰
吾生平無愧俯仰歿後汝曹居官主清治家主嚴
奉先主敬叙族主恩造次顛沛必主忠信雖貧賤
不失爲有德君子不然獵取光顯奚爲哉官至朝
奉大夫累贈金紫光祿大夫陸游爲行狀閩書
林師益以父豫任奏補三班借職授樞密院宣差鷄
澤縣尉上書論邊防利害譏切時政留京師候旨
金兵深入廷臣奏師益論多可采有旨差充京畿
第十四副將提舉京城四壁守禦使司後軍統制

及金犯京師以侍從孫傳等薦改第一副將楊時在講筵奏師益曉達軍政使專督訓練必有續效可觀授正將守禦鄭州原武金人自滑州渡河再犯京師諸將皆遁惟師益孤軍守原武不動劉韜爲丞相何棗謀亟召師益兵入援師益行次封邱遇金人迎戰大破之明日金兵大至師益謂其副曰敵衆我寡此吾致命之秋也遂力戰死之一男若淵甫晬一女九歲妻葉氏與乳媪襁負南歸兄師舜官中大夫全家蒙難師夔通直郎亦歿於王事

縣志

福建續志

卷四十二 人物二

二十六

傅知柔字德潛仙遊人宣和進士調循州判盜曾少龍逼境知柔教民造百枝弩及置砲石寇至乘城發擊寇潰去事聞改秩知龍巖縣會虔寇發聞知柔威名卒不敢犯調泉州僉判海寇林元仲猖獗帥檄知柔招撫元仲遂降官至朝請郎福州僉判著有文集

閩書

蘇欽字伯承仙遊人宣和進士歷惠州錄叅調知閩清帥張浚嘉其廉退能治劇改閩縣與漕帥賀允中交薦改知新建時諸邑多逋賦郡責盡數徵之欽謂民力告竭賦足常歲幸矣必欲取辦非重施

箠楚不可爲民父母何忍出此吾有去耳守不能
屈改江西帥屬值贛卒叛帥多諮謀畫事平論功
擢守巴州巴無牙兵例出脚粟三千緡欽悉封還
以代輸賦尋除轉運使時吳璘屯重兵於興元知
欽出張浚門深加欽敬尋卒欽廉儉出天性文學
飾吏治割俸市田分給諸弟嘗寓福州嘉福院有
鐘樓爲黥卒所穢鐘不鳴及欽至鳴如初爲記其
事有兩漢提要十卷子洸以父廕補官知臨川縣
縣有述陂久廢洸復之民蒙其利時經錢缺解洸
捐俸代輸尋倅賓州又攝桂府武弁陳某以鬻爵

福建續志

卷四十二

人物二

二十七

爲邊吏交通諸蠻納賂巨萬事覺逮獄當路觀望
莫能決屬洸治之卒正典刑除知雷州秩滿赴闕
面陳三劄一乞折納徐聞丁米以便民一乞籍海
舟以緝奸盜一乞戒約廣西寨不得差人回易孝
宗嘉納除知新州賜對便殿又請易常平陳米除
豁耗折虛數及經理邊江被水民田租稅上趣之
郡比至百姓歡迎州賦無羨餘月給廩俸皆先屬
吏去日持空卷出嶺移封州首請減丁米及經制
無額之數丁內艱服闋除知辰州尋退休扁所居
曰止足年七十八卒洸爲政務興利除害不以發

摘爲聰明故所至民安所去民思稱廉吏焉子權登第長子稟孫熹皆以廕補縣令

縣志

孫知微仙遊人以朝請大夫通判舒州紹興元年賊劉忠入其境執知微以去知微不屈賊怒斃而食

之

縣志

楊興宗字似之莆田人紹興進士授鉛山主簿孝宗卽位上封事召入審察言和議非便忤湯思退除武學博士丞相陳俊卿舉充館職除秘書省正字選校書郎與師林光朝同省修四朝會要成轉宣教郎權尙書司勳論張說不當與趙汝愚同拜不

福建續志

卷四十二 人物二

二十八

報又以封爵大擾不書勲忤時相出知温州以嫌改嚴州終湖廣提舉

舊通志

林師說字箕仲豫第三子少舉進士以父廕當補官遜於從兄師文及弟師龍晚試銓曹第一調嚴州司士時青溪盜初平作新寨屯兵驕甚郡請師說攝理經書悍卒知警遷知德化縣還道桐廬會盜發邑民遮道乞留郡白之朝因改建德縣賊平倅新定寇犯二浙新定民大恐師說白郡將請靜待之自擁十餘騎出城遇寇騎諜曰若以城降者賞師說叱之立擒斬於市以故新定之民嬰城死守

累遷兵部員外郎知建昌軍丞相趙鼎力薦之拜
廣東運判韓京以武將立功知循州驕不可制師
說上其姦狀後京謂人曰監司直須還此老第於
我少恩耳除浙東提點刑獄山陰爲畿內貴人多
肆豪奪師說一繩以法因忤權貴請祠歸里九年
卒

閩書

薛珩字景行莆田人與弟璆聯鄉薦珩紹興十二年
進士歷廣東湖北檢法官疑鼎州鞠盜華五等非
辜與憲臺爭不合欲投劾去未幾果獲眞盜憲臺
交薦之凡四爲法官平反百餘人璆字景徐乾道

福建續志

卷四十二

人物二

二十九

二年特奏名監廣州西南道場有鬻私鹽至六萬
觔者吏捕以告法當得賞璆嘆曰刑數十人易一
官吾不忍爲遂諭吏以十之一聞官餘悉投水中
皆得輕坐終南恩州推官

縣志

許巽字少陽仙遊人稹之子乾道五年進士知歸善
縣時尉有捕民爲盜以求賞者巽驗問非實不爲
理太守入尉說庭詰巽曰行法在太守執法屬
有司守不能奪知滁州時監司及鄰郡皆有互送
錢每月不下三百餘緡巽盡歸公帑吏胥懾服有
以百金餽吏吏辭曰使秘書知之措身何地改知

漳州未任召赴行在卒終朝散大夫人號爲耐貧翁先是父稹卒例以恩廕命未到不敢歛哭曰人子不能自致功名希致仕恩以累先人乎人皆贖之子彥爲進士

縣志

吳珏字仲玉仙遊人淳熙十四年特奏名尉南海縣以捕盜應格改承務郎知龍巖縣節浮費以益學廩郡僚有議增諸邑轉輸者珏爭罷之會有詔造戰艦州下取材珏拒以非故例不獲免則高其直以市不以擾民簽書寧國軍節度判官有嫠婦無子或以戶絕將没入其貲珏曰利毫末以絕人將

福建續志

卷四十二 人物二

三十

墜之緒不仁請聽其立嗣通判漳州未及土而卒

縣志

蔡洸字子平仙遊人父伸左中大夫洸以廕補將仕郎中法科除大理評事遷寺丞歷戶部郎總領淮東軍馬錢糧知鎮江府會西溪卒移屯建康舳艫相銜時久旱郡民築陂瀦水溉灌漕司檄郡決之父老泣訴洸曰吾不忍獲罪百姓却之已而大雨漕運通歲大熟民爲歌曰我瀦我水以灌以溉俾我不奪蔡公是賴除司農少卿言鎮江三邑稅戶客戶輸丁各異請爲一體所輸丁絹依和買之直

計尺折納人給一鈔官自買絹起發公私皆便上
嘉納之以戶部侍郎召試吏部尙書移戶部上謂
侍臣曰朕以版曹得人爲喜洸嘗言財無滲漏則
不可勝用未幾求去除徽猷閣學士知寧國府歸
卒年五十七洸事親孝曾祖襄未易名請於朝賜
謚忠惠所得俸每以分親戚之貧者去日垂橐至
售所賜銀鞍韉以行人服其清後居雪川
宋史
葉棠字次魏仙遊人以祖顒蔭授承務郎累遷知邵
武軍陞辭首奏法孝宗仁孝勤儉光宗納之乞外
知台州紹定元年夏大水城幾圯棠極力防衛卒

福建續志

卷四十二 人物二

三十一

賴以全委僚屬之愛民檢禾蠲放旣及分又增一
分遣官糴米浙西以充濟糴民賴之尋擢浙東提
舉明年九月台城陷於水朝廷以棠得台民心亟
發常平錢米遣棠措置賑卹棠至卽奏乞撥紹興
府官會五萬貫米二萬石仍乞免本州茶鹽酒醋
稅一年有旨令棠權州事仍撥降安邊所官會二
十萬貫米七萬石以助不給其五縣冬苗夏稅盡
行蠲放棠分遣僚屬隨鄉煮粥以活餓者復用資
遺以撫流民造糴鄰郡以濟急缺招誘客販以備
接續拯阨羸埋遺屍於是重築城堤堅厚完固越

歲再水不能爲害台民德之旋提舉成都府玉局
觀丞相杜範舊有相知之雅以將作監召命下而
歿自號萬竹陳宗卿銘其墓子彥昞歷司農寺丞
知邵武軍書閩
丁南一字宋傑莆田人伯杞子少爲叔伯桂所奇平
生屢挫場屋寶祐元年年五十七始登進士第二
人調懷安尉公族有僦居以婦墜胎告屋主者南
一辨胎以藥墜坐誣民有負逋自經者子訟債主
南一曰汝父縊死誰斷其舌搜其家得舌於圃民
有溺死者父訟主家南一曰兩手有泥沙自溺也

福建續志

卷四十二

人物二

三十二

人皆服之改東筦監稅帥使謝子強曰此非所以
浼儒者欲處以他職力辭子強薦之於朝復以忤
外臺劾罷貧不能出嶺嶠南士人率子弟行束修
師事之漕使鄭協辟爲廉泉書院山長洪天錫至
檄攝海陽教授兼文公元公兩書院山長志縣
陳堯則字敬于仙遊人可大四世孫以父廕補餘姚
尉歷知吉水帝昺溺海堯則死之志縣